

TE HEHEURAA API

I neia i te piha neneiraa a Henere i Roto Miti i Utah no te Ekalesia a Iesu Mesia i te Feia Mo'a i te Mau Mahana Hopea Nei. i Papeete, Tahiti, i te mau fenua Sotaiete, i te mau avae atoa. Te hoo e piti farane i te matahiti hoe.

Nu. 11

Novema, 1915

Mat. 9

“Inaha hoi, te faatupu ra te Fatu i te taata no roto i to ratou iho nunaa e to ratou iho re'o i te mau fenua atoa, ia haapii i ta ta'na ra parau; oia ia, o te mau mea atoa ta'na e man'o i roto i to'na paari, o te au ia ratou; e no reira i ite ai tatou e, te feruri ra te Fatu ma te paari i te au i ta te parau-tia e te parau mau.”—Alama 29:8.

TE VEA KATORIKA E TA'NA RA HAAPIIRAA I TE OROA A TE FATU.

(Tuatiraa)

Te tuu nei au i teie nei uiraa ia oe e Mataio; e Mataio? Eaha oe i papai haapoto noa'i, i te mau parau no Iesu i roto i ta oe Evaneria, aita oe i faaroo papu i ta Katorika i haapii mai e, ua huna o Iesu i to'na tino i raro a'e i te hoaho'a pane, e tei hea oe i te taime i rave ai Iesu i te pane, e Eaha oe i ore i ite ai i te huna raa o Iesu ia'na iho i raro a'e i te pane ta'na i vavahi ra, e aore râ ua haamoe noa ia'na iho i raro a'e i te pane mai ta'na i haamoe noa ia'na iho na rotopu i te mau taata i taora ia'na i te ofai, e outou hoi e

Mareko e Luka e Ioane, o te mau Aposetolo outou na te fatu, o outou a'ia i taua oroa ra, no te aha, aita outou i papai maramarama i roto i ta outou mau Evaneria e, ua huna o Iesu i; to'na tino na raro a'e i te pane, e aore ra e tino mau e toto mau ta outou i vavahi e i amu i muri a'e i te revaraa o Iesu i nia i te ra'i.

E o oe hoi i Iesu o tei rave i te pane i mua i te aro o ta oe ra mau Aposetolo i nia i te iri ra, a tuu atu ai oe i na parau e toru ra ia ratou, ua faariro anei oe i te pane ta oe i vavahi ra ei tino, e ua imi i te hoe ravea e huna ia oe i raro a'e i te pane ra, te ia oe te ite i te reira no te mea, e Atua oe, e tamaiti na te teitei, ua ite oe i te mau ohipa atoa a te taata nei, te maitai, e te ino, no tei hea vahi ra, to oe mau hoa Katorika i taputo ai, no ta oe parauraa'tu e "a rave mai a amu o tau tino teie, e ua na reira atoa i te a'ua na ô atu ra, a inu outou atoa." Mataio 25: 26, 27.

E aha oe i faataa'i i te pane e te uaina i roto i na farii e piti, e o oe hoi i faamu i ta oe mau pipi i te pane na mua, e muri a'e o te pape vine ia, oia hoi te (uaina) ia inu ratou atoa. Aore roa ia, te mau Perepitero e horoa i te pape ia ratou, oia hoi i te mau pipi, e mea ê roa'tu hoi ta oe haapiiraa i ta ratou ra haapiiraa ua patoi puai ratou i ta oe parau o tei na ô mai e, "O tau tino teie e horoahia na outou nei, e na reira outou ei mana'o raa ia'u." Luka 22:19.

E ere anei ua vaiiho ratou, e ua faarue i te haamana'oraa, o tau tino râ, o ta ratou ia e tiaturi puai nei, o ta oe ia i vavahi e ua opere i ta oe ra mau pipi, ua tia anei ia i to oe mana'oraa? Ahiri oe eiaha e parau faahou mai i muri mai, "e na reira outou ei mana'o raa ia'u," e riro ia matou ei ite haavare no te Evaneria.

E o oe hoi e Paulo e Aposetolo parau mau i mua i te aro o te taata nei, o tei faaite i te mau parau no Iesu, o reira

atoa anei oe i taua oroa ra? e ua ite anei oe ia Iesu i te hunaraa ia'na iho i raro a'e i te pane? e aore râ, ua ite anei oe i te tahi haapiiraa a te mau Aposetolo i mua'tu ia oe ra e, e tino mau e toto mau ta ratou i amu i muri a'e i te revaraa o Iesu i nia i te ra'i? E aore râ, ua haapii anei oe i te mau oire ta oe e a'o i te Evaneria ra e, "e amu tatai hoê noa'tu te feia faaroo i te tino o Iesu, aita ona e pau? E mea ê roa'tu hoi ta oe papai raa'tu i te Etaretia i Korinetia, ua na ô atu hoi oe e, "ei mana'o raa. ia'u" ua na ô faahou mai, "ei faaiteraa i te pohe o te fatu e tae noa mai oia ra." Korinetia I, 11: 24, 25, 26. Aita outou i faahiti noa'e i te tahi vahi a te mau Katorika i roto i ta outou na mau puta, ua faarue paha outou i te reira haapii raa, no reira to tatou mau hoa i faahahau ê atu ai i te parau mau no te Evaneria i na ô mai ai e, "ua tuu, ua vaiho, ua huna o Iesu i to'na iho tino mau i raro a'e i te hoaho'a pane."

Teie te tahi "E ere no te hoho'a e no te hoho'a ore i haapii ai te Etaretia Katorika e e tino mau no Iesu i roto i te uhari?"

No te aha ra? pahono raa no reira mau no te hoho'a mau i nia i te pane i haapii a'i ratou e e tino mau e toto mau, ahiri no te hoho'a ore i nia iho aore ratou e e haapii e e tino mau, aore roa e moe ta ratou tafifi raa parau e te faahuru ê raa i te mau parau no te Evaneria. Te imi noa nei ratou i te mau pahono raa atoa ia tiama ta ratou haapiiraa Hae-reti no te mea e ere i to te Evaneria, no te taata ana'e. Eaha e paari anei ta te taata ohipa? aore roa ia.

Ua oti hoi i te papaihia e, "O te paari hoi o teie nei ao e mea maama ia i te Atua; ua oti hoi i te papai hia e, "Te haafifi nei oia i te feia paari i to ratou iho paari." E ua papaihia hoi, Ua ite te fatu i te mana'o o te feia paari e e mea faufaa ore ia." Korinetia I, 3: 19, 20.

Teie â te tahi “no te mea ia euhia” te faraoa ua mau roa te hoho’a o Iesu i nia i taua faraoa i ama ra, ua haapoto noa o Padrecito i teie nei vahi e, “no te mea ia eu hia” aita roa oia i faaite papu i te tia mau.

Ua na ô anei au i roto i te Heheuraa apî e, (ia euhia) aita roa’tu, teie te tia mau, “No te mea ua ooti-hia e ratou te hoho’a o Iesu i nia i te hoê auri i haamanihia no te pane,” e eaha oia i huna’i ei faahuru ê ai, e ere anei, no te mea o te ite tona mau taeae ua hape mau. Aore o Iesu i na reira, mea parau noahia ia, “O tau tino teie” e ere mai ta te mau Perepitero, e ooti i te hoho’a o Iesu i nia i te auri, na ratou iho teie ravea apî i haafifi ei haapouri i te mana’o o te taata atoa, ia faarue i te mea tia a pee atu ai i ta te taata nei.

Teie te tahi “e ere anei teie i te hoê tumu faahiahia roa ta Pahoa i ite ra.”

Eaha taua tumu faahiahia roa ta Pahoa i ite ra? teie taua tumu ra ua euhia e ratou te hoho’a o Iesu te tamaiti mo’a a te Atua ei faaina raa na ratou. E mauruuru anei te Atua i te reira huru peu auraa ore? aore roa ia.

Te faaaau atoa nei Padrecito i ta ratou hamani raa pane, mai te taata e oomo i te moni i roto i to ratou pute vai raa moni o te Repupirita iho, a ore râ o te taata iho, Naporeo ta ratou i oomo i roto i te pute moni, e Inaha ua mau roa te hoho’a no te Repupirita, e to Naporeo i nia iho i te moni ra, na vai e patoi teie nei faaaau raa hape? maori ra na Paulo.

Te na ô atura Paulo i te mau taata no Ateno ra e, “E teie nei, e tamarî tatou na te Atua ra, eita e tia ia mana’o tatou e e au te Atua i te auro, e te Ario, e te ofai i taraihia i te aravihi e te ravea paari a te taata nei.” Ohipa 17: 29.

Eaha te tahi parau a Paulo te na ô atura oia i te Eta-retia Kolosa ra e “O te haavare mai te hoê taata’tu ia outou

i te parau taparu i na reira'tu ai au." "E ara o te riro noa'tu outou i te parau paari e te haavare faufaa ore a te hoê taata'tu, i te parau tutuu a te taata nei mai te â rii a teie nei ao ra, aore au i ta te Mesia ra." Kolosa 2: 4, 8.

E ere anei te fafaaite nei Paulo i te mau haapii raa hape a te taata nei aore i au i te haapii raa a te Mesia ra; oia mau roa ia.

Teie faahou te tahi a taua vea ra "ua faahuru ê faahou oia (Pahoa) i te haapiiraa te Etaretia Katorika." oia hoi "ua pau i te amuhia."

Na vai i haapii mai e e tino mau e toto mau; na te "Momonî" anei? na Porotetani anei? na te Tanito anei i parau e o tona tino maoti tana i opere atu i to'na mau aposetolo e ta ratou i amu? e tapao papu roa teie na Katorika iho i faahapa i ta'na iho parau, e tapao te amu no te aha, e tapao te vaiiho no te aha, ahiri a faaite mai, teie te pahono raa, e tapao te amu no te pau roa, o te hopea ia no taua parau ra e amu, e tapao te vaiiho no te aha. Pahono raa e tapao te vaiiho no te toe te tahi vahi, no te aha, aita i na ô mai e, ua hape, ta te Etaretia Katorika haapiiraa ei aha e imi haere noa'tu i te mau faabula paieti ore, ei paturu i te mau parau a te Atua, a moe roa'tu ai te e'a maramarama, a topa'tua'i te taata taatoa i roto i te pouri taotao e tae noa'tu i te mahana haavaraa.

Te na ô maira, te tahi vahi o taua mau parau paieti ore i roto i taua vea ra e "Hi'o mata noa'tu te mau taata taatoa ia'u nei aita roa'tu vau i pau." Ua au anei teie i te haapii raa na te feia e uruhia e te varua o te Atua? Aita roa'tu ia. Ua au râ teie i te hoê mau parau a te mau taurearea ori haere noa, a parau atu ai i ta ratou ra mau parau area-rea ia ratou iho, mai te faufaa ore, aore i roto i te parau a te Atua. Te ui atu nei au ia outou o tei ite i te pahono raa,

teie, ia hi'o mai te mau taata taatoa ia'u nei, aita roa vau i pau, no te aha, no te mea o to ratou mau mata anae to ratou i hi'o mai ia'u nei, no reira aita vau i pau, ahiri to ratou mau vaha tei amu mai ia'u, ua pau roa ia to'u tino taatoa, aita e toe?

Eaha, ua hi'o te mata, ua amu ia i to ratou mana'o raa? aita, aita roa'tu, na teie i faaite mai ia ratou i te hape rahi o te haapiiraa a te taata nei, e ere i te mea tauturu hia e te varua o te Atua.

Teie faahou te tahi a Padrecito "eiaha ia vare i te mau otoheraa hairesi, e to ratou faahuru ê raa parau."

Te na ô mai nei e, eiaha, ia vare i te mau otohe raa hairesi, eaha e pahi auahi ia, a otohetohē ai i muri, o ratou a'tu ia o te mau hairesi o tei faahuru ê i te mau parau a te Atua i papai hia i roto i te Bibilia area te Etaretia a Iesu Metia i te Feia Mo'a i te Mau Mahana Hopea nei, aore roa ratou e otohe i muri, e haere â ratou i mua i te paari mau, o te mau parau ta ratou i haapii raa e mea heheu hia mai ia e te Atua, e ua riro ratou ei nuu tamai na te Atua, o Iesu to ratou raatira vî ore, e tei nia ia ratou te haana tama'i a te Atua, a hi'o i te Ephetia 6: 11-18. E teie nei te faaite papu nei au i mua i te mau taata e tai'o i teie nei Heheuraa e, ua upootia te Heheuraa Apî i tonora mau mana'o maitatai i rotopu i tona ra mau enemi no te mea te ite papu nei au e, o te Etaretia i ririhia e i faainohia ra o ta Iesu mau ia Etaretia e ia pohe ratou mai te haamani ino e tia. E te mau taata e, a faaea i te faaruru noa i roto i te vero a roohia outou e te pohe, e faaoioi maira i roto i te muriavai ra o te tiataro raa maitai i te tau vero ra e roaa te ora no to outou na Varua.

Pahoa a Tahiaroa.

TE MAU PARAU API

E fare pureraa to te mau tinito i te oire ra Chicago i Amarika. Te parahi nei i taua oire e maha tausani tinito faaroo Chiritiano. E ere tau fare pure no te tahi haapaaoraa ana'e; aita i nehenehe ia parauhia e fare pure Katokika e aore râ e fare pure Porosetane. E fare pure râ no te mau tinito faaroo Chiritiano ra.

—o—

E neneihia i roto i te Ve'a i teie nei mau avae i te tahi mau parau i papaihia e te mau taeae Tahiti. No te rahi o te mau mana'o maitai rahi i roto i taua mau parau ra, te tumu ia i neneihia'i. Na taua mau parau ra i faaite mai e te feruri maitai e te hohonu taua mau taeae ra. A faaitoito Taha e Mapuhi e Pahoa.

—o—

Te rave nei te mau taote i te tahi faraoa mei'a ei raau no te feia i roohia i te ma'i.

—o—

Tei Tarafonia i Amaraka te hoê tumu raau avota (avacado) maitai rahi. No te maitai o taua tumu raau ra, na te fatu o taua tumu i ani i te tahi Sotaiete Paruru, e paruru i taua tumu i te pohe i te moni rahi oia hoi e 30,000 dala. Ia

pohe taua tumu ra na te Sotaiete e horoa i te taata na'na te tumu raaa e 30,000 dala.

—o—

I roto i teie matahiti ua hotu mai taua tumu ra e toru tausani avota; e ua roaa i te fatu e hoê afa dala i te avota hoê, oia hoi e hoê tausani e pae hanere dala no te maa o taua tumu hoê. Ua hoo atoa atu taua taata ra i te mau amaa rii apî i oteo mai ia poi hia i nia i te tahi mau tumu. Ua roaa mai ia'na no taua mau amaa rii apî i hoohia'tu e hoê tausani e pae hanere dala. No reia te taatoaraa o te moni roaa ia'na no taua tumu hoê ra e toru ia tausani dala. Te maa i pê ino roa e neneihia e ua roaa i te hinu, e hinu hoi e huru au i te hinu olive. Te roaa nei na roto i te mau huero avota te tahi huru ereere ei faaere i te ahu.

—o—

Na te hoê taata i Oregon i hamani i te hoê pereoo e tere na nia te fenua mai te pereoo uira te huru e e tere atoa na te pape mai te tahi boti uira. E roaa i tana pereoo ra e 30 maile i te hora hoê a tere ai oia na te fenua e e roaa e 15 maile na roto i te pape. Ua mairihia te io'a "Amphibion" i nia i taua pereoo; te auraa ia, e puaa tei au i te pape e te fenua atoa.

Toae a Maere, Faaau Parau,
Rue Dumont d'Urville, Orovini, Papeete, Tahiti.

Frank J. Fullmer, Imprimeur,
2532 Seventh East Street, Salt Lake City, Utah